

Mer hät mich gfrögt

Mer hät mich gfrögt, öb i ächt tät welle
Eu allne i Versform hüt öppis verzelle
Aber natürli, gärn mach i das
Mer sötti nume wüsse - was.
I ha lang mis Hirni müesse plage
und dänn au no mis Herz echli frage.
Plötzli fallts mer ii, ja ganz genau,
i verzell Eu vomene Ma und ere Frau.
Vo mine Grosseltere und i danke mir,
das sind zwei lüt, sicher grad so wie ihr.
I glaube, dass Grosseltere sehr wichtig sind
und öppis ganz speziells für es Chind.
E Chindheit ohni Grosseltere, wär niemals so schön,
s'wär wie e Musig mit e paar fählende Tön,
wie en Himmel ohni Sterne oder ohni Sunne,
wie Stude ohni Blüete oder en halb volle Brunne.
Min Grossvater dä hät en Schnauz gha im Gsicht,
en wunderschöne, aber eine wo sticht.
Bim Guetnachtsäge, - i han immer müesse danke,
oh chönnt mer doch dä an Bügel hänke.
Grad so wie de Tschope, aber gseit hani nüt.
und dass i das ha chönne, freut mi no hüt.
I han immer gwüsst, er isch en Maa,
wo alles weiss und alles cha.
I han gwüsst, er chunt bi allem drus.
Er hät mich glehrt sprinseile vor em Hus,
isch güpft mit dem Seil, grad wie en Junge
und isch immer viel höher als i gsprunge.
Er hät alli Blueme und Tier kännt mit Name
Und hät mich glehrt Mitleid ha mit de Arme.

Meistens hät er e Pfiffe gha im Sack,
hät sie füro gnoh und gstopft mit Tubak.
Uf em Bänkli vorem Hus, i aller Rueh
simmer gsässe - und sin Rauch gaht em Himmel zue.
Aber öppis hät er nöd chöne, das hät en fascht echli gstoche,
das isch lisme gsi - und öppis rächts choche.
Für all das hät mer en nöd chönne ha,
für das hani ebe e Grossmuetter gha.
I han immer tänkt, s'chochi niemer so guet,
wie das grad nu mini Grossmuetter tuet.
En elektrische Chochhärde hät sie nöd kännt,
sie hät zum choche Holzschittli verbrännt.
Ufeme Stuehl bini knünlet näbet dem Herd,
ha törfe rüehre und luege öbs au öppis wärd.
Wie würd sie hüt stune und säge - herrjeh,
wänn sie all eusi Chuchimaschine chönnt gseh.
Und dänn ebe s'lisme, dass mer das cha,
das inestäche und umeschla,
mich häts tunkt, das segi ja ganz liecht,
bis i's dänn sälber ha probiert.
Mini Griossmuetter hät mit Geduld und so gschickt,
mis ganz Gnusch und dä Durenand gflickt.
Emal hani öppis posget, has gmacht ganz lätz.
Mini Muetter isch grüsli cho id Sätz
und dänn hät sie gschumpfe, aber nöd nu e Bitz,
das hät tönt wines Gwitter mit Dunner und Blitz.
Mini Grossmuetter gaht verbii, seit liesli und gschwind,
bis doch au nöd eso sträng mit dem Chind.
Die Wort hani tänkt, vergiss i nie,
Aber ebe sie hät mich nöd muesse erzieh.